



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

**Sumáriu Kazu
Tribunál Distritál Suai
Outobru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :22

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	12
Artigu 1757, 1758, 1759, 1762, 1765, 1786, 1782,	Ezersísiu póder paternál	1
Artigu 177 KP	Abuzu seksuál ba menór	1
Artigu 172 KP no Artigu 171 KP no Artigu 182 KP no artigu 2,3, 35 Lei Kontra Violénsia Doméstika (LKVD)	Violasaun seksuál. koasaun seksuál ho agravasaun ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	1
Artigu 177 KP no artigu 182 KP	Abuzu seksuál ba menór no agravasaun	1
Artigu 316 KP	Kontra bandu	2
Artigu 140 KP no Artigu 184 KP	Omisídiu negligente no ofensa ba integridade fizika negligente	1
Artigu 167 KP	tortura ka tratamentu kruel degradante ka dezumanu	1

Artigu 172 KP	Violasaun seksuál	1
Artigu 145 KP	Ofensa ba integridade física simples	1
Totál		22

2 Totál desizaun ne'ebé JSMP monitoriza:14

Tipu pena	Artigu	Númeru
Pena Multa	Artigu 67 KP	9
Suspensaun ba prizaun nia ezekusaun	Artigu 68 KP	2
Omologa	Artigu 262 KPP	2
absolve		1
Totál		14

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua tuir JSMP nia monitorizasaun: 8

B. Deskrisaun sumáriu julgamentu ba desizaun kazu sira

1. Krime ofensa ba integridade física simples

Nú. Prosesu : 0103/21 BBMLV
 Kompozisaun tribunál : Singulár
 Juis : Dra. Patricia de Fatima Xavier
 Prokuradór : Dr. Rafael Jeronimo Gusmão
 Defeza : Dr. Gaspar Gusmão Ferreira
 Desizaun : Omologa Dezisténsia keixa

Iha 03 Outobru 2022, Tribunál Distritál Suai prezide julgamentu tentativa konsiliaun ba krime ofensa ba integridade física simples ne'ebé envolve arguidu Basilio Godinho no Cipriano Godinho hasoru lezadu Poligarpo Soares, iha Munisípiu Bobonaro.

Akuzasaun prokuradór

Prokuradór akuza katak iha 07 Maiu 2021, iha oras tuku 14:00 lokraik, lezadu ba nia feen nia uma atu foti nia hena ho roupa, arguidu Basilio mós iha neebá no fó hatene ba lezadu dehan '*foti Ita nia roupa lalais, sé lae hau baku mate ó' iha kuartu laran, lezadu mós hatan dehan 'ó baku took'*'. Hafoin arguidu basa keda dala ida iha lezadu nia hasan, basa dala rua no tuku dala ida iha lezadu nia ulun no arguidu sipriano basa dala ida iha lezadu nia kanuruk rezulta moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál tinan 3 ka multa.

Produsaun ba prova sira

Bazeia ba artigu 262 nú.1 KPP kona-ba tentativa konsiliaun, nune'e antes tama ba julgamentu produsaun ba prova, juis husu halo tentativa konsiliaun ba lezadu ho arguidu.

Iha prosesu tentativa konsiliaun antes ne'e lezadu hakarak ba iha julgamentu maibé iha produsaun ba prova juis tenta nafatin ho konsiliaun nune'e lezadu deside hodi hakarak dada

ninia keixa hasoru arguidu sein kondisaun tanba konsidera arguidu sira lezadu nia rian deit no arguidu sira mós konkorda ho lezadu ninia pedidu dezisténsia keixa no promete sei la repete tan hahalok hanesan iha futuru.

Alegasaun finál

Prokuradór no defeza husu ba tribunál atu omologa parte rua ninia akordu dame no absolve arguidu husi krime.

Desizaun

Bazeia ba akordu dame husi parte rua no pedidu dezisténsia keixa husi lezada. Nune'e tribunál konklui prosesu ne'e no omologa kedas akordu pedidu dezisténsia keixa no absolve arguidu husi krime.

2. Krime ofensa ba integridade fízika simples ho natureza violénsia doméstika

Nú. Prosesu : 0009/21.MFFBL
Kompozisaun tribunál : Singulár
Juis : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende tinan 1

Iha 10 Outobru 2022, Tribunál Distritál Suia prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu AF hasoruninia feen CdC, iha Munisípiu Manufahe.

Akuzasaun prokuradór

Prokuradór akuza katak iha 04 Setembru 2021, iha oras tuku 11:55 dadeer, arguidu silu lezada nia liman riba ba raj, sama lezada nia kotuk, tuku dala rua iha kotuk laran no foti kadeira masa baku dala ida iha lezada nia ain kabun parte loos rezulta lezada isin moras no bubu. Antes ne'e arguidu hemu tua lanu fila uma buka hahan maibé hahan la iha no husu ba lezada maibé lezada hatan fali ba arguidu dehan *ó ba badiu iha ne'ebé mak foin buka hahan*, ho ida ne'e arguidu nerbozu no halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 (LKVD).

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak durante moris hamutuk ho lezada foin primeiravés baku lezada, arguidu arrepende ninia hahalok, promete futuru sei larepete ninia hahalok ne'e hasoru lezada.

Alende ne'e lezada kontinua konfirma faktu sira iha akuzasaun no deklara katak depoisde akontesimentu arguidu labaku ona lezada, lezada haktuir katak durante moris hamutuk arguidu primeiravés baku lezada no lezada perdua ona arguidu ninia hahalok.

Alegasaun finál

Prokuradór, konsidera arguidu provadu komete krime hasoru lezada nu'udar nia feen no konfirma husi lezada, agora sira di'ak malu ona no depoisde akontese arguidu larepete nia hahalok, nune'e husu ba tribunál atu kondena arguidu ho pena suspensaun.

Enkuantu, defeza haktuir katak, agora sira di'ak malu ona no to'o agora la iha problema seluk, nune'e husu ba tribunál atu fó justisa ba arguidu.

Desizaun

Depois avalia faktu sira hotu, tribunál prova katak arguidu provadu komete krime hasoru lezada. Arguidu silu lezada nia liman riba ba rai, sama lezada nia kotuk, tuku dala rua iha kotuk laran no foti kadeira masa baku dala ida iha lezada nia ain kabun parte loos rezulta lezada isin moras no bubu.

Bazeia ba fatu provadu sira ne'e no tetu mós sirkunstánsia atenuante sira hanesan arguidu konfesa, arrepende no promete sei repete tan nia hahalok, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

3. Kazu sivíl regulasaun ba ezersísium podér paternál

Nú. Prosesu	: 0010/22.CVTDS
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa dezisténsia keixa

Iha 10 Setembru 2022, Tribunál Distritál Suai prezide julgamentu tentativa konsiliaun ba kazu regulasaun ezersísium podér paternál ne'ebé envolve autór João Baptista idade tinan 14 no Ricardo Estevão dos Santos idade tinan 11 hasoru rekeridu Orlando Soares no Ingrasia Gusmão dos Santos nu'udar autór nia inan-aman, iha Munisípiu Covalima.

Termu no fundamentu sira

Iha 06 Maiu 2020, rekeridu sai husi uma fila ba nia família tanba deskonfia rekerida ho mane seluk, desde rekeridu sai husi uma rekeridu nunca mai vizita ninia oan no la fó alimentasaun kada laron no nesesidade seluk ba menór sira, nune'e menór nain rua hatama asaun ne'e hodi kontra rekerida no rekeridu. Kazu ne'e relasiona ho ezersísium podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

Tentativa ba konsiliaun

Iha julgamentu tentativa konsiliaun ne'e rekeridu konkorda menór nain rua hela nafatin ho rekerida menór sira nia inan, rekerida konkorda menór nia aman libre mai vizita menór nain rua iha tempu ne'ebé rekeridu hakarak mai, bainhira laron boot sira ka selebra tinan, rekeridu iha direitu bele lori menór sira ba ninia uma hodi selebra hamutuk no depois lori menór sira fila ba rekerida. Rekerida informa katak kada fulan menór nain rua gasta US\$150.00.

Tribunál halo esplikasaun ba rekeridu no rekerida kona-ba oinsa fó alimentasaun ba sira nia oan no osan ne'ebé rekerida hatete katak kada fulan menór nain rua gasta to'o US\$150.00, ne'e sei responsabiliza ba menór nia inan-aman, nune'e rekeridu pursentu 50 no rekerida pursentu 50, rekerida US\$75.00 no rekerida US\$75.00 kona-ba osan alimentasaun ida ne'e rekeridu (aman) hatete katak nia serbisu hanesan agrikultór rekeridu la iha kbi'it atu fó osan US\$75.00 alimentasaun ba menór sira no rekeridu hakarak hamenus alimentasaun ne'e ba iha US\$ 50.00, ho ida ne'e rekerida mós konkorda no hahú Novembru osan refere sei transfere ba rekerida nia konta bankaria.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk ona hodi tau-matan ba menór sira.

Desizaun

Bazeia ba parte rua nia akordu kona-ba rezime guarda, regime vizita no rezime alimentasaun, nune'e tribunál konklui prosesu ne'e no omologa akordu.

4. Krime ofensa ba integridade física simples ho natureza violénsia doméstika

Nú. Prosesu : 0015/22.PDSUA
Kompozisaun tribunál : Singulár
Juis : Dra. Patricia de Fatima Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 9 suspende tinan 1 fulan 6

Iha 17 Outobru 2022, Tribunál Distritál Suia prezide julgamentu leitura sentensa ba krime ofensa ba integridade física simples ho natureza violénsia doméstika envolve arguidu QdC hasoru lezadu (oan entiada) JAdFdC, iha Munisípiu Covalima.

Akuzasaun prokuradór

Prokuradór akuza katak loron no fulan la lembra ona maibé iha tinan 2019 arguidu basa dala ida makas iha lezadu nia hasan parte karuk rezulta kanek no ran sai.

Tuir mai iha tinan 2020, arguidu basa dala ida iha lezadu nia hasan parte karuk, antes ne'e arguidu hatete lezadu dehan '*ó ne'e hau mak fó han no lezadu mós hatan ho lian makaas*', nune'e arguidu nerbosu no komete aktu refere hasoru lezadu.

Tuir fali mai iha 2021, arguidu tuku dala ida iha lezadu nia oin laran rezulta moras no ran sai husi inus, antes ne'e arguidu ho lezadu nia inan diskute malu no atu baku lezadu nia inan, nune'e lezadu foti besi kanu baku arguidu maibé besi kanu ne'e kait fali kurtina no la konsegue kona arguidu no arguidu hadau tiha besi kanu hafoin mak arguidu komete krime refere hasoru lezadu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál tinan 3 ka multa konjuga ho artigu 2, (a) 3 (d), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun, arguidu deklarata katak lezadu hela ho arguidu no arguidu mak tau matan ba lezadu maibé banhira arguidu haruka lezadu atu halo serbisu maibé lezadu lakohi no haksasuk malu fali ho arguidu nune'e arguidu nerboju halo agreasaun refere hasoru lezadu. Arguidu deklarata katak depoisde akontesimentu arguidu ho nia feen sai husi uma no ba hela iha *kos* no arguidu ho lezadu seidauk di'ak malu.

Alende ne'e lezadu kontinua konfirma faktu sira iha akuzasaun no deklarata katak lezadu to'o agora seidauk di'ak malu ho arguidu no arguidu hela ketak ona.

Alegasaun finál

Prokuradór, haktuir katak arguidu provadu komete krime hasoru lezadu bazeia ba arguidu nia deklarasaun no konfirma husi lezadu, nune'e husu ba tribunál atu kondena arguidu tuir artigu 145 KP.

Entretantu, defeza husu ba tribunál atu fó pena admoestasaun ba arguidu tanba arguidu konfesa integralmente ba faktu sira hotu, arguidu arrepende, promete sei la halo tan hahalok hanesan iha futuru no arguidu mós komete aktu ne'e tanba arguidu ko'alia ba lezadu maibé lezadu nunka rona ka halo tuir.

Desizaun

Depoisde avalia faktu sira hotu, tribunál prova arguidu komete krime ofensa ba integridade fízika simples ho natureza violénsia doméstika hasoru lezadu nu'udar nia oan entiada.

Bazeia ba faktu provadu sira ne'e no tetu mós sirkunstánsia hotu-hotu haleu krime ne'e hanesan arguidu la iha antisidentes kriminais foin primeiravés mai hatan iha tribunál, nune'e tribunál konklui prosesu ne'e no kondena arguidu kada krime tribunál aplika pena prizaun fulan tolu hamutuk fulan sia no tribunál aplika pena fulan sia suspende ba tinan ida fulan neen.

5. Krime ofensa ba integridade fízika simples ho natureza violénsia doméstika

Nú. prosesu : 0021/21.BBCLC
Kompozisaun tribunal : Singulár
Juis : Dra. Patricia de Fatima Xavier
Prokuradór : Dr. Rafael Jeronimo Gusmão
Defeza : Dr. Domingos Dos Santos
Desizaun : Pena Multa US\$ 45.00 no selu kusta judisiál US\$20.00

Iha 17 Outobru 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu AB hasoru nia feen FN, iha Munisípiu Bobonaro.

Akuzasaun prokuradór

Prokuradór akuza katak iha 16 Outobru 2021 iha oras tuku 11: 00 meiodia lezada mai iha aledeia Beateho, Suku Atudara Cailaco hodi buka tuir arguidu ne'ebé la tama uma ona durante semana rua.

Bainhira lezada too fatin ne'e lezada haree arguidu iha sira nia uma no lezada husu ba arguidu '*tanba sá mak hau telefone ó nunca atende*' hafoin lezada basa kedas dala rua iha arguidu nia hasan nune'e arguidu fila buti lezada nia kakorok halo lezada book aan la di'ak no sente moras.

Konsekuénsia husi arguidu nia hahalok ne'e halo lezada sente moras iha kakorok no lezada ba halo tratamentu iha postu Saúde Nundoí.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 kona-ba (LKVD).

Produsaun ba prova sira

Iha prosesu julgamentu arguidu nega katak nia la buti lezada nia kakorok maibé arguidu ka'er iha lezada nia jaket hodi dudu ses atu la bele provoka arguidu. Arguidu mós deklara katak nia la fila ba uma tanba sei halo lia iha arguidu sira nia uma. Arguidu deklara katak nia sai husi uma komesa problema ne'e akontese arguidu la fila ba uma to'o de'it agora no deside hela ketak hosi lezada. Arguidu deklara katak sira rezolve ona tuir kultura timor nian no família parte rua hasoru malu hodi rezolve ona.

Alende ne'e lezada konfirma faktu sira iha akuzasaun, sira rezolve ona tuir kultura maibé arguidu ho lezada hela fahe malu ona.

Alegasaun finál

Prokuradór, konsidera arguidu provadu komete krime hasoru lezada bazeia ba arguidu nia deklarasaun. Tanba ne'e husu ba tribunál atu kondena arguidu ho pena suspensaun.

Entretantu, defeza husu ba tribunál atu decide tuir konfiksaun tribunál nian, tanba haree ba arguidu konfesa ba faktu sira, arrepende no promete sei la halo tan hahalok hanesan iha futuru.

Desizaun

Depoisde avalia faktu sira hotu, tribunál prova katak arguidu provadu komete krime ofensa integridade fizika simples hasoru lezada nu'udar nia eis feen.

Bazeia ba faktu provadu sira ne'e no tetu mós sirkunstánsia atenuante sira hanesan lezada mak baku uluk arguidu no depois arguidu baku fali lezada, arguidu mós la iha antisidentes kriminais, foin primeiravés mai hatan iha tribunál, arrepende nia hahalok, nune'e tribunál konklui prosesu ne'e no kondena arguidu ho pena multa US\$ 45.00 loron ida arguidu sei selu sentavus 0.50 durante loron 90, bainhira arguidu la kumpre pena multa refere arguidu sei kumpri pena prizaun durante loron 60. Tribunál mós kondena arguidu selu kusta judisiál US\$20.00.

6. Krime ofensa ba integridade fizika simples ho natureza violénsia doméstika

Nú. Prosesu : 0119/21.BBMLV
Kompozisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Pascasio de Rosa Alves
Defeza : Dr. Jonas Henrique da Costa
Desizaun : Pena Multa US\$ 45.00

Iha 17 Outobru 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violénsia doméstika envolve arguidu AM hasoru nia feen VS, iha Munisípiu Bobonaro.

Akuzasaun prokuradór

Prokuradór akuza katak iha 05 Dezembru 2021, iha oras tuku 19:00 kalan, arguidu tuku dala ida iha lezada nia ren-toos, uza helem baku dala ida iha ulun, tebe dala ida iha lezada nia liman kabun parte loos no tebe dala ida iha lezada nia ain rua no tafui kaben ba lezada nia oin. Antes ne'e lezada empresta ema nia osan sein kuñesimentu husi arguidu, nune'e arguidu nerboju no halo agreasaun refere hasoru lezada, kazu ne'e aneksa mós ho relatóriu médiku husi Pradet.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 (LKVD).

Produsaun ba prova sira

Iha julgamentu, arguidu konfesa faktu sira hotu iha akuzasaun, arguidu arrepende nia hahalok, depoisde akontesimentu kalan ne'e kedan arguidu husu deskulpa ba lezada, arguidu antes nunka baku lezada, foin primeiravés mai hatan iha tribunál no promete iha futuru sei labaku tan lezada.

Alende ne'e lezada mós kontinua konfirma faktu sira iha akuzasaun no deklara katak durante moris hamutuk to'o oan nain lima ona maibé arguidu nunka baku lezada no nia oan sira, lezada deklara katak nia baku lezada tanba nia empresta ema nia osan la fó hatene ba arguidu no lezada deklara katak perdua arguidu nia hahalok.

Alegasaun finál

Prokuradór haktuir katak iha julgamentu arguidu konfesa faktu sira iha akuzasaun no konfirma husi lezada, arguidu promete sei labaku tán nia feen no konsidera sirkunstansia sira ne'e nune'e husu ba tribunál atu kondena arguidu ho pena mais adekuadu.

Enkuantu defeza husu ba tribunál atu kondena arguidu ho pena multa, tanba iha julgamentu arguidu konfesa, arrepende no promete sei labaku tan lezada no agora sira di'ak malu.

Desizaun

Depoisde avalia faktu sira hotu, tribunál prova katak arguidu tuku dala ida lezada nia ren-toos, uza helem baku dala ida iha ulun, tebe dala ida iha liman kabun parte loos no tebe dala ida iha lezada nia ain rua no tafui kaben ba lezada nia oin.

Bazeia ba faktu provadu sira ne'e tetu mós sirkunstánsia atenuante sira hanesan arguidu foin primeiravés mai hatan iha tribunál, arrepende nia hahalok, antes ne'e nunca problema no depoisde akontesimentu mós la iha problema foun, nune'e tribunál konklui prosesu ne'e no kondena arguidu ho pena multa US\$ 45.00, kada loron arguidu sei selu sentavus 0,50 durante loron 90, tribunál mós fiksa pena alterntiva loron 60.

7. Krime ofensa ba integridade física simples natureza violência doméstica

Nú. Prosesu : 0028/22. CVSLL
Kompozisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Multa US\$ 90.00 selu kusta judisiál US\$ 10.00.

Iha 17 Outobru 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violência doméstica envolve arguidu CY hasoru ninia feen VdSM, iha Munisípiu Covalima.

Akuzasaun prokuradór

Prokuradór akuza katak, iha 01 Outobru 2021, iha oras tuku 12:00 meiodia, arguidu basa dala tolu iha lezada nia hasan parte loos, buti dala ida iha kakorok no rasta lezada nia fuuk monu ba rai. Antes ne'e arguidu lori nia aman ba hasoru arguidu nia feen ki'ik no lezada mós tuir arguidu nune'e arguidu ho lezada diskute malu, arguidu nerboju no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 LKVD.

Produsaun ba prova sira

Iha prosesu julgamentu, arguidu konfesa faktu iha akuzasaun no deklara arrepende ninia hahalok, promete iha futuru sei labaku tán lezada no ema seluk, di'ak malu ona no agora hela iha uma ida de'it.

Alende ne'e lezada kontinua konfirma faktu sira iha akuzasaun no deklara katak di'ak malu ona no depoisde akontese labaku ona lezada to'o ohin loron.

Alegasaun finál

Prokuradór haktuir katak, arguidu provadu komete krime hasoru lezada ne'ebé arguidu rasik konfesa no konfirma husi lezada, maibé prokuradór haree katak krime violénsia doméstika volume aas tebes no oinsa atu halo prevensaun iha futuru, husu ba tribunál atu kondena arguidu ho pena suspensaun.

Entretantu, defeza husu ba tribunál atu kondena arguidu ho pena multa tuir arguidu nia kapasidade ekonomia, ne'ebé arguidu konfesa, arrepende no di'ak malu ona.

Desizaun

Depoizde avalia faktu sira hotu, tribunál prova katak arguidu basa dala tolu iha lezada nia hasan parte loos, buti dala ida iha lezada nia kakorok no rasta lezada nia fuuk monu ba rai.

Bazeia ba faktu provadu hirak ne'e no tetu mós sirkunstánsia atenuante sira hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$ 90.00, arguidu lora ida sei selu US\$1.00, durante lora 90, bainhira arguidu la kumpre pena multa refere arguidu sei kumpri pena prizaun lora 60, tribunál mós kondena arguidu selu kusta judisiál US\$10.00.

8. Krime kontrabandu

Nú. Prosesu	: 0005/16.BBBGD
Kompozisaun Tribunál	: Koletivu
Juis	: Dr. Naason Mário Armindo Marques Doutel, Dr. Eusebio Xavier no Dra. Patricia
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena Multa US\$ 30.00

Iha 18 Outobru 2022, Tribunál Distritál Suai prezide julgamentu leitura akordaun ba krime kontra bandu envolve arguidu Marcos Fernandes hasoru estadu RDTL, iha Munisípiu Bobonaro.

Akuzasaun prokuradór

Prokuradór akuza katak iha 24 Marsu 2016, iha oras tuku 15:30, lokraik membru UPF *prosede auto stop* hodi pasa revista ba dokumentu motorizada ne'ebé arguidu inporta husi Indonezia mai Timor-Leste la liu husi Alfandega. Motorizada ho marka *Honda Mio Beat* kor mean-mutin la iha xapa matrikula ne'ebé arguidu hatama husi Kupang Indonezia atraves husi nia primu ho montante US\$ 1200.00. arguidu la iha karta lisensa exportasaun-inportasaun no la iha mós karta sosa-faan nian.

Prokuradór akuza arguidu kontra artigu 316 KP kona-ba kontra bandu ho moldura penál tinan 2 to'o tinan 6 ka multa.

Produsaun ba prova sira

Iha prosesu julgamentu, arguidu konfesa faktu sira iha akuzasaun, arguidu foin primeiravés mai hatan iha tribunál, arrepende nia hahalok no promete iha futuru sei lakomete tan krime hanesan.

Alegasaun finál

Prokuradór husu ba tribunál atu kondena arguidu tuir artigu 316 KP. Enkuantu defeza husu ba tribunál atu fó justisa ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu hatama sasan laliu husi alfandega. Bazeia ba faktu provadu no tetu mós sirkunstansia hotu-hotu, nune'e tribunál konklui prosesu ne'e no kondena arguidu ho pena multa US\$ 30.00, arguidu sei selu kada loron ida sentavus 0.50 durante loron 60, tribunál mós fiksa pena alternativa durante loron 40 no objetu aprendidu afavór ba estadu.

9. Krime ofensa ba integridade física simples ho natureza violência doméstica

Nú. Prosesu : 0008/21.MFFBL
Kompozisaun tribunál : Singulár
Juis : Dra. Patricia de Araújo Fatima Barreto Magno Xavier.
Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena Multa US\$ 45.00

Iha 19 Outobru 2022, Tribunál Distritál Suia prezide julgamentu leitura sentesa ba krime ofensa ba integridade física simples ho natureza violência doméstica envolve arguidu DAVY hasoru ninia feen JMDX, iha Munisípiu Manufahe.

Akuzasaun prokuraór

Prokuradór akuzas katak iha 03 Novembru 2021, iha oras tuku 11:30 dadeer arguidu basa dala ida iha lezada nia matan, basa dala ida iha lezada nia ibun parte karuk no basa dala ida iha lezada nia kanuruk rezulta lezada oin nakukun no monu ba rai. Antes ne'e lezada haruka arguidu atu fase roupa maibé arguidu lakohi no sira diskute malu, arguidu nerboju no komete aktu refere hasoru lezada.

Prokuradór akuzas arguidu kontra artigu 145 KP kona-ba ofensa integridade física simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak depoisde akontesimentu arguidu ba hela iha sela polísia durante loron ida no fila ba uma husu kedas deskulpa ba lezada, arguidu deklara katak durante moris hamutuk foin mak baku lezada no depoisde akontese labaku ona lezada to'o ohin loron, arrepende nia hahalok, promete sei labaku tán lezada no arguidu foin primeiravés mai hatan iha tribunál. Presinde lezada hodi larona nia deklarasaun.

Alegasaun finál

Prokuradór haktuir katak, arguidu provadu komete krime hasoru lezada, ne'ebé arguidu rasik konfesa maibé harre katak krime violência doméstica ass tebes nune'e atu prevene krime ne'e iha futuro, husu ba tribunál atu kondena arguidu tuir artigu 145 KP.

Enkuantu defeza, haktuir katak arguidu konfesa faktu sira hotu, arrepende nia hahalok no depoisde akontesimentu la iha ona problema seluk tanba ne'e defeza harre katak pena mais adekua ba arguidu mak pena admoestasaun.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia matan, basa dala ida iha lezada nia ibun parte karuk no basa dala ida iha lezada nia kanuruk rezulta lezada oin nakukun no monu tun ba rai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravés mai hatan iha tribunál, arrepende nia hahalok, husu ona deskulpa no depoisde akontesimentu mós la iha problema foun, nune'e tribunál konklui prosesu ne'e no kondena arguidu ho pena multa US\$ 45.00 loron ida arguidu selu sentavus 0,50 durante loron 90, tribunál mós fiksa pena alterntiva loron 60.

10. Krime kontrabandu

Nú. Prosesu : 0094/19.BBMLV
Kompozisaun Tribunál : Koletivu
Juis : Dra. Patricia de Araújo Fatima Barreto Magno Xavier,
Dr. Naason Mário Armindo Marques Doutel no Dr. Eusebio Xavier
Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena Multa US\$ 30.00

Iha 19 Outobru 2022, Tribunál Distritál Suai prezide julgamentu leitura akordaun ba krime kontra bandu envolve arguidu Luis Maia de Araújo hasoru estadu RDTL, iha Munisípiu Bobonaro.

Akuzasaun prokuradór

Prokuradór akuza katak iha 27 Juñu 2019, iha oras tuku 20:00 kalan, arguidu la'o husi mota nunura ba iha bazar Turiskai Indonezia no hasoru malu ho Sr. Carlito hodi sosa sigaru karton haat kada karton ida arguidu sosa husi Sr Carlito US\$950.00, karton haat hamutuk US\$ 3800.00 hafoin arguidu inporta liuhusi dalan ilegal iha área Tapo Memo no bainhira lori to'o iha kompañia UPF Tunu bibi, Polísia UPF pasa revista no halo kedas aprensaun ba objetu sigaru karton haat ne'e.

Arguidu la iha karta lisensa kona-ba inportasaun exportasaun nian, arguidu nia aktu ne'e fó prejuizu ba estadu.

Prokuradór akuza arguidu kontra artigu 316 KP kona-ba kontra bandu ho moldura penál tinan 2 to'o tinan 6 ka multa.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak durante ne'e nunka hatama sasan ilegalmente, foin mak hatama sasan ilegalmente, depoisde polísia ka'er no prende sasan sira ne'e to'o agora lahatama ona sasan sira ne'e, arrepende ninia hahalok no foin primeiravés mai hatan iha tribunál.

Alegasaun final

Prokuradór haktuir katak, arguidu komete krime tuir faktu sira iha akuzasaun, mesmu arguidu konfesa maibé prokuradór haree katak comunidade sira besik fronteira hatama sasan ilegalmente bebeik, nune'e atu prevene krime ne'e iha futuru husu ba tribunál atu kondena arguidu tuir artigu 316 KP.

Enkuantu defeza haree arguidu konfesa ba faktu sira, arrepende nia hahalok, depoisde Polísia kaer arguidu, lahatama ona sasan liu husi dalan ilegal, nune'e husu ba tribunál atu aplika pena ne'ebé mais adekuadu.

Desizaun

Tribunál prova katak arguidu hatama sasan liu husi dalan ilegal, bazeia ba faktu provadu sira ne'e no tetu mós sirkunstansia atenuante sira hanesan arguidu foin primeiravés mai hatan iha tribunál,

arrepente ninia hahalok no depoisde akontesimentu arguidu la repete ninia hahalok, nune'e tribunál konklui prosesu ne'e no kondena arguidu ho pena multa US\$ 30.00, arguidu sei selu sentavus 0,50 durante loron 60, tribunál mós fiksa pena alternativa durante loron 40.

11. Krime ofensa ba integridade física simples ho natureza violéncia doméstika

Nú. Prosesu : 0004/22. BBBBV
Kompozisaun Tribunál : Singulár
Juis : Dra. Patricia de Araújo Fatima Barreto Magno Xavier.
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Multa

Iha 24 Outobru 2022, Tribunál Distritál Suia prezide julgamentu leitura sentensa ba krime ofensa ba integridade física simples ho natureza violéncia doméstika envolve arguidu HM hasoru nia feen AM, iha Munisípiu Covalima.

Akuzasaun prokuradór.

Prokuradór akuza katak iha 26 Marsu 2022, iha oras tuku 02:00 madrugada, arguidu hadau tiha ai-sanak husi lezada no baku dala rua iha lezada nia ulun. Antes ne'e arguidu ho nia primu sira hemu tua no komesa barullu oituan nune'e sira nia oan mane ba fó hatene lezada no lezada ba hasee arguidu sira dehan '*kalan boot hemu tua ne'e la ba deskansa iha uma halo fatin ne'e barullu ema atu deskansa mós ladi'ak*' hafoin lezada silu tiha ai-sanak baku dala rua iha arguidu nia liman parte loos no arguidu hadau fali ai-sanak ne'e no baku fali lezada.

Prokuradór akuza arguidu kontra artigu 145 KP kona-ba ofensa integridade física simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 (LKVD).

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak depoisde akontesimentu liu oras rua hanesan ne'e di'ak malu kedas, arguidu foin prinmeiravés mai hatan iha tribunál, arrepente ninia hahalok no promete sei labaku tán lezada.

Presinde lezada tanba arguidu konfesa faktu sira hotu iha akuzasaun.

Alegasaun finál

Prokuradór husu ba tribunál atu kondena arguidu tuir artigu 145 KP, bazeia ba sirkunstansia sira ne'ebé produs iha audénsia julgamentu.

Entretantu, defeza husu ba tribunál atu kondena arguidu ho pena multa, ho konsiderasaun arguidu konfesa, arrepente ninia hahalok, di'ak malu ona no promete labaku ona lezada.

Desizaun

Depoisde avalia faktu sira hotu, tribunál prova katak arguidu provadu komete krime ofensa integridade física simples hasoru lezada.

Bazeia ba faktu provadu sira ne'e no tetu mós sirkunstánsia atenuante sira hanesan lezada mak baku uluk arguidu no depois arguidu baku fali lezada, arguidu mós la iha antisidentes kriminais, foin primeiravés mai hatan iha tribunál, arrepente nia hahalok, nune'e tribunál konklui prosesu ne'e no kondena arguidu ho pena multa US\$ 45.00, loron ida arguidu sei selu sentavus 0.50 durante loron 90, bainhira arguidu la kumpre pena multa refere arguidu sei kumpri pena prizaun durante loron 60.

12. Krime ofensa ba integridade física simples ho natureza violéncia doméstika

Nú. Prosesu : 0003/21.MFTRC
Kompozisaun Tribunál : Singulár
Juis : Dra. Patricia de Araújo Fatima Barreto Magno Xavier.
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Multa US\$ 45.00

Iha 24 Outobru 2022, Tribunál Distritál Suia prezide julgamentu leitura sentesa ba krime ofensa ba integridade física simples ho natureza violéncia doméstika envolve arguidu FdBT hasoru ninia feen LdC, iha Munisípiu Manufahe.

Akuzasaun prokuradór

Prokuradór akuzas katak iha 05 Juñu 2021, iha oras tuku 17:00 lokraik arguidu foti kadeira masa baku dala lima iha lezada nia ulun no baku dala ida iha liman parte loos, antes ne'e lezada diskonfia arguidu amante ho feto seluk, maibé arguidu rejeita nune'e sira diskute malu, arguidu nerboju no komete aktu refere hasoru lezada.

Prokuradór akuzas arguidu kontra artigu 145 KP kona-ba ofensa integridade física simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun, arguidu deklara katak foin primeiravé mai hatan iha tribunál, durante moris hamutuk ho lezada foin mak baku lezada, husu ona deskulpa ba lezada no nia família hodi fó sala osan US\$ 50.00 no bibi ida ba lezada ho nia família no arguidu promete iha futuru sei lakomete tan krime hanesan hasoru lezada no ema seluk.

Alende n'e lezada kontinua konfirma faktu sira hotu iha akuzasaun, lezada reforsa arguidu nia deklarasaun katak depoisde akontesimentu arguidu husu ona deskulpa no fó sala hanesan arguidu nia deklarasaun no depoisde akontesimentu to'o agora arguidu labaku ona lezada.

Alegasaun finál

Prokuradór, haktuir katak arguidu provadu no prosidente tuir faktu sira iha akuzasaun ne'ebé arguidu rasik konfesa no konfirma husi lezada, maibé prokuradór harre katak krime violéncia doméstika aas tebes nune'e atu halo prevensaun ba krime ne'e iha futuru, husu ba tribunál atu kondena arguidu tuir artigu 145 KP.

Entretantu defeza haktuir katak arguidu konfesa, arrepende nia hahalok, husu ona deskulpa ba lezada, nune'e husu ba tribunál atu kondena arguidu ho pena multa.

Desizaun

Depoisde avalia faktu sira hotu, tribunál prova katak arguidu foti kadeira masa baku dala lima iha lezada nia ulun no baku dala ida iha liman parte loos.

Bazeia ba faktu provadu sira ne'e no tetu mós sirkunstánsia atenuante sira hanesan arguidu foin primeiravés mai hatan iha tribunál, arrepende nia hahalok, antes ne'e nunca iha problema no depoisde akontesimentu mós la iha problema, nune'e tribunál konklui prosesu ne'e no kondena arguidu ho pena multa US\$ 45, loron ida arguidu selu sentavus 0,50 durante loron 90, tribunál mós fiksa pena alternativa durante loron 60.

13. Krime ofensa ba integridade física simples ho natureza violéncia doméstika

Nú. Prosesu : 0007/21.BBBGD
Kompozisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Multa US\$ 45.00

Iha 24 Outobru 2022, Tribunál Distritál Suai prezide julgamentu leitura sentesa ba krime ofensa ba integridade fizika simples ho natureza violénsia doméstika envolve arguidu AM hasoru nia feen TS, iha Munisípiu Bobonaro.

Akuzasaun prokuradór

Prokuradór akuza katak iha 26 Juñu 2021, iha oras tuku 22:15 kalan, arguidu basa dala ida lezada nia hasan, parte karuk, tuku dala ida hasan parte karuk no arguidu atu riba lezada ba rai maibé lezada halai sai ba liur, arguidu tuir buti makaas lezada nia kakorok, hafoin sira nia oan Adre Martinho hafahe sira. Antes ne'e arguidu atu tau osan ba sira nia oan ne'ebé eskola iha Indonezia Surabaya maibé lezada lakohi no sira diskute malu, arguidu nerbosu komete krime refere hasoru lezada. Kazu ne'e aneksu ho relatóriu médiku husi Pradet.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa konjuga ho artigu 2, (a), 3 (b) 35, (b) no 36 LKVD.

Produsaun ba prova sira

Iha prosesu julgamentu, bainhira tribunál esplika arguidu nia direitu no dever sira no tribunál lee leitura akuzasaun ba arguidu maibé arguidu hili direitu nonok, depoisde alegasun tribunál husu arguidu atu apresenta prova seluk atu defende aan antes tribunál hatun desizaun, husi ne'e arguidu ko'alia no konfesa fali faktu sira iha akuzasaun katak faktu sira iha akuzasaun loos hotu tanba ne'e mak iha inisiu-ohin arguidu hakarak hili direitu nonok ne'e.

Alende ne'e lezada kontinua konfirma faktu sira hotu iha akuzasaun, lezada deklara katak arguidu foin mak baku lezada no depoisde akontesimentu arguidu labaku ona lezada to'o ohin loron, lezada perdua ona arguidu nia hahalok no hadomi nafatin arguidu.

Alegasaun finál

Prokuradór, haktuir katak mesmu arguidu hili direitu nonok maibé lezada kontinua konfirma faktu sira hotu iha akuzasaun, krime violénsia doméstika ass tebes iha área juridisun tribunál distritál Suai no atu prevene krime ne'e husu ba tribunál atu kondena arguidu tuir artigu 145 KP.

Enkuantu, defeza haktuir katak perante julgamentu arguidu konfesa, arrepende nia hahalok no depoisde akontesimentu la iha ona problema seluk, nune'e husu ba tribunál atu deside tuir konfiksaun tribunál nian.

Desizaun

Depois avalia faktu sira hotu, tribunál provo katak arguidu basa dala ida iha lezada nia hasan parte karuk, tuku dala ida hasan parte karuk no arguidu atu riba lezada ba rai maibé lezada halai sai ba liur no arguidu tuir buti makas lezada nia kakorok.

Bazeia ba faktu provadu sira ne'e no tetu mós sirkunstánsia hotu-hotu ne'ebé haleu krime, nune'e tribunál konklui prosesu ne'e no kondena arguidu ho pena multa US\$ 45.00, arguidu sei selu loron ida US\$1.00 durante loron 45, tribunál mós fiksa pena alternative loron 30.

14. Krime violasaun seksuál, koasaun seksuál no agravasaun ho natureza violénsia doméstika

Nú. Prosesu : 0011/19.PDSUA
Juis : Dra. Patricia Xavier Dr. Naasson Sarmento, Dr. José Maria de Araujo no
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Absolve

Iha 26 Outobru 2022, tribunál Distritál Suai prezide julgamentu leitura akordaun ba krime violasaun seksuál, koasaun seksuál no agravasaun ho natureza violénsia doméstika, arguidu AdC hasoru lezada DM, iha munisípiu Ainaro.

Akuzasaun prokuradór

Prokuradór akuza katak iha 25 Juñu 2016 iha oras tuku 10:00 dadeer, arguidu ho lezada ba toos atu silu batar, iha área lalen Ganyo aldeia Ainaro ki'ik iha foho alico Postu-administrativu Hatu-Udo. Bainhira to'o iha fatin refere arguidu komesa hakuak lezada husi kotuk no kous lezada hodi la'o tama ba toos laran ho distansia metru 15 hanesan ne'e, arguidu hatun lezada hodi latan ba rai, hasai lezada nia roupa no halo relasaun seksuál ho lezada.

Hafoin halo tiha relasaun seksuál ho lezada arguidu foti lezada nia roupa hodi fó hatais no haruka lezada fila uluk ba uma, lakleur arguidu mós tuir lezada ba uma no iha dalan arguidu husu lezada dehan ema mai kala'e, lezada dehan ema la mai. Hafoin lezada dehan ba arguidu katak avo sé karik hau hetan buat ruma hau la hatudu ba ema seluk, hau hatudu ba avo de'it, arguidu ameasa dehan *'se ó hatudu hau, hau lori katana ho tudik ta'a ó'*.

Arguidu deklara katak iha altura ne'e arguidu ho lezada la konsegue silu batar no sira nain rua deside fila ba uma, maibé iha dalan, arguidu dehan ba lezada katak *'ne'e hamrik loss ne'e'* mesmu nune'e lezada kontinua dehan kuandu buat ruma mosu hau hatudu nafatin avo.

Tanba sente tauk ho liafuan ameasa atu taa nia ho katana, lezada la informa problema ne'e ba arguidu nia feen ka lezada nia avo fetu. Bainhira sira nia avo fetu iha uma sira haree malu hanesan bai-bain maibé avo fetu kuandu laiha arguidu sempre halo hanesan hakuak, rei no halo kedas relasaun seksuál hanesan feen-laen.

Faktu hatudu, arguidu halo relasaun seksuál ho lezada iha toos laran arguidu kontinua prátika aktu seksuál koitu vajinál dala barak hasoru lezada hanesan feen-laen to'o lezada grávida fulan lima maka família foin hatene. Hahú iha Juñu 2016, arguidu haree lezada hanesan nia feen tanba bainhira lezada lakohi toba ho arguidu, sempre ameasa lezada ho tudik, katana no hodi fatuk tuda, dala ruma nia basa ho tebe no obriga halo relasaun seksuál loro-loron.

Arguidu sempre hafuhu nia ferik oan bainhira nia ferik oan laiha arguidu sempre bolu lezada ba toos no bainhira lezada lakohi arguidu sempre hatudu oin buis ba lezada.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15, artigu 171 KP kona-ba koasaun seksuál ho moldura penál tinan 2 to'o tinan 8 no artigu 173 kona-ba agravasaun konjuga ho artigu 2 (b), 3 (d), 35 (b) no 36 LKVD.

Produsaun ba prova sira

Iha julgamentu, arguidu deklara katak faktu sira ne'ebé akuza ba arguidu laloos hotu, arguidu nega katak sira halo relasaun ne'e tanba lezada mak tama tan ba arguidu nia kuartu bainhira lezada nia avo fetu ba tiha bazar iha madrugada. Arguidu mós nega katak arguidu nunca uja

katana, tudik ka obriga lezada maibé bainhira arguidu presiza lezada sempre pruntu. Arguidu deklara tán katak sira halo relasaun seksuál dala barak iha toos no lezada nia avo fetu laiha, arguidu deklara mós katak lezada hahalok la diak, oin moris nomós gosta husu osan hodi hola pulsa fó ba mane.

Aliende ne'e, lezada kontinua konfirma ho akuzasaun antes hodi deklara katak lezada pruntu halo relasaun ho arguidu tanba lezada sempre hetan ameasa no bainhira halo relasaun seksuál arguidu sempre kaer katana. Lezada deklara katak arguidu nunka fó lezada ba halimar ho ninia maluk sira nomos viziñu sira ne'ebé besik ho sira. Lezada deklara katak bainhira lezada lakohi ba toos arguidu sempre hatudu oin suar ba lezada nune'e halo lezada tauk hodi tuir deit arguidu ba toos.

Testemuña RdC nu'udar lezada nia avo fetu ne'ebé antes ne'e tribunál tenta husu atu testemuña hato'o ninia depoimentu ka la presiza maibé testemuña deside hodi fó depoimentu ba tribunál katak testemuña hamutuk ho arguidu nomós lezada inklui ho oan mane ki'ik ida hela hamutuk iha uma lisan ne'ebé luan loss no laiha kuartu. Testemuña deklara mós katak dala ruma arguidu ho lezada mak ba toos hamutuk, dala ruma mós lezada mak tuir de'it arguidu ba iha toos ho distansia dook la'o ain kauze oras rua. Testemuña deklara katak dala ruma arguidu ho lezada toba deit iha toos, arguidu iha uma nunka kaer katana, lezada mós sempre ba tuir seremonia sira no ba halimar ho nia kolega sira, lezada mós iha telefone ida ne'ebé laiha kamera.

Testemuña LdS nu'udar Lezada nia tiun hato'o ninia depoimentu katak testemuña lahatete no nunka rona koa-ba kazu ne'e, maibé iha loron ida testemuña husi nia uma ba iha arguidu sira nia uma ne'ebé ho distansia dook oituan. Testemuña rona husi lezada nia avo katak lezada moras horok ran mutin nune'e testemuña hanoin hodi lori lezada ba konsulta no iha loron segunda testemuña lori duni lezada ba klinika hodi konsulta no husi konsulta ne'e sira deskobre katak lezada isin rua no fulan lima ona, nune'e testemuña husu kedas ba lezada hodi informa katak labarik ne'e avo Antonio nia oan.

Testemuña SF nu'udar lezada nia inan hakiak depoimenta katak lezada komesa nia aman mate testemuña foti kedas nia hodi hakiak, bainhira lezada halo tinan 15 arguidu mak mai foti lezada ba uma lisan hodi han bâtar, nune'e testemuña mós husik lezada ba ho nia avo tanba lezada nia avo rasik mak husu. Depoisde lezada hela iha arguidu sira nunka atu fila mai haree testemuña ne'ebé ferik ona nomós hanesan fetu faluk ida, lezada ba haree testemuña dala ida deit maibé lezada dehan fila kedas tanba avo Antonio hirus nune'e lezada ba hela de'it ho nia avo sira to'o de'it kazu ne'e akontese.

Alegasaun finál

Prokuradór haktuir katak iha julgamentu mesmu arguidu nega katak sira halo relasaun seksuál ho konsentimentu, maibé rona husi lezada no konfirma faktu sira iha akuzasaun, prokuradór entende katak lezada hanesan arguidu nia bei-oan rasik no ba hela hamutuk ho arguidu atu eskola maibé arguidu komete fali hahalok refere hasoru nia bei-oan, nune'e prokuradór husu ba tribunál atu kondena arguidu ho pena únika tinan sanulu resin rua.

Defeza haktuir katak iha julgamentu, arguidu nega faktu katak arguidu ho lezada halo relasaun ne'e ho konsentimentu tanba relasaun seksuál foin primeiravés maibé bebeik ona, ho nune'e defeza solisita ba tribunál atu absolve arguidu husi krime.

Desizaun

Depoisde avalia faktu sira hotu, tribunál konsidera arguidu ho lezada halo relasaun seksuál ho konsentimentu tanba bazeia ba tribunál nia konfiksaun katak lezada ho arguida la'os foin mak

halo relasaun seksuál maibé sira halo relasaun seksuál dala barak to'o lezada gravida mak foin ba apresenta keixa hasoru arguidu. Nune'e tribunál konklui prosesu ne'e hodi absolve arguidu husi krime no absolve arguidu husi selu tasa judisiál.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>